



Izrečena presuda uhapšenom u akciji Rampa Željko Pažin osuđen na godinu robije i mora platiti 500 KM

**Pažin i Zvonko Knežević 11. aprila potpisali su sporazum
kojim je Knežević dobio 14, a Pažin 12 mjeseci robije**

Cetnaest dana nakon Zvonka Kneževića, jučer je u Sudu BiH osuđen i njegov kompanjon u švercu droge Željko Pažin. Njemu je izrečena zatvorska kazna od godinu, a istovremeno će morati platiti i 500 KM, te sudske troškove. Stočani Pažin i Knežević su uhapšeni u akciji kodnog imena Rampa.

Slaba zarada

Presudu je, nakon prihvatanja sporazuma o priznanju krivnje, izreklo Sudsko vijeće kojim je predsjedavao sudija Izo Tankić. Pažinu se u kaznu uračunava vrijeme koje je proveo u pritvoru od 2. do 29. augusta 2013.

Uoči izricanja presude sudija Tankić upitao je Pažina da li razumije da mora platiti 500 KM, te da li je toliko zaradio od šverca droge. Pažin je odgovorio da je "slabo šta zaradio".

Tužiteljica Elvira Stanojlović pojasnila je da je prilikom sklapanja sporazuma Tužilaštvo cijenilo to što je optuženi isti dan kada i Knežević koji je dobio 14 mjeseci zatvora priznao krivnju, što prije nije bio kažnjavan, te jer

je porodičan čovjek i otac četvoro djece. Pored toga, imali su u vidu sudsku praksu u predmetu Ali Lokaj, kada su Lokajevi saradnici, nakon priznanja krivnje, Vidak Milić i Vahidin Dobrača osuđeni na godinu zatvora, dok su Nermir Planinčić i Nijazi Muharemi dobili godinu i po robije.

Pažinov branilac Izet Baždarević rekao je da je odbrana prihvatila sve navode Tužilaštva. Dodao je da Tužilaštvo nije imalo nijednu otežavajuću okolnost, a da je postojalo više olakotnih okolnosti za njegovog branjenika. Dodao je da je Pažin invalid i penzioner i da će kazna postići svrhu kažnjavanja.

Šverc skanka

Pažin se teretio da je sa Kneževićem od kraja 2012. do augusta 2013, kao pripadnik grupe za organizovani kriminal zajedno s više osoba iz BiH i Hrvatske švercovao skank iz BiH u Pulu u Hrvatskoj. Pažin i Knežević uhapšeni su početkom augusta 2013. **SIPA** je tada pretresla četiri lokacije u Mostaru, Stocu i Čapljini te zaplijenila 13 kilograma skanka. Tada su u Puli uhapšeni Tomica

Jerković, Perica Kovačević, Milan Mustapić i Ante Šimović. **D. P.**

SVRHA KAŽNJAVANJA

Advokat Izet Baždarević naveo je da je njegov branjenik invalid i penzioner, te da smatra da će izrečena kazna postići svrhu kažnjavanja





Pažin po izlasku iz zgrade Suda BiH sa advokatom Izetom Baždarevićem
Presudu izrekao sudija Tankić